





# LE BALLET

## DV COVRTISAN.



34

A PARIS,  
Chez TOUSSAINT DV BRAY,  
ruë S. Iacques, aux Espics meurs,  
& au Pallais, à l'entree de la  
galerie des prisonniers.

---

M. DC. XII.  
*Avec Priuilege du Roy.*







# LE BALLET

DV COVRTISAN.

**M**ONSIEVR,  
Ie sçay bien que vous auez  
l'esprit si beau & si réglé, que  
en quelque lieu que vous soyez, vous  
ne vous y ennuyez iamais: si est ce que  
ie vous eusse désiré à la Cour il y a  
quelques iours, tant pour le contête-  
mēt que i'eusse eu de vous voir, cōme  
de celuy que vous eussiez pris d'un  
Ballet qui merite que ie vous en re-  
presente l'ordre. Premièrement vn  
Courtisan couuert d'un clinquāt aux  
despens de ses créaciens, entroit suiuy  
de trois pages, & d'āçoit sur vn air par-

A ij

4

ticulier, puis cōmāda à l'vn de ses pages d'aller querir vn Tailleur, qui vint sur vn air nouueau qu'ils dācerent tous ensemble: Ce pēdant le Tailleur prend la mesure d'vn habit au Courtisan, & à la fin luy presente ses parties, que le Courtisan deschire: le Tailleur a recours à des Sergents, & leur met en main vne obligation du Courtisan pour le mettre en prison, à faute d'auoir payé ses parties.

### LE TAILLEUR DIT,

**I**E suis Tailleur de mon mestier,  
On me cognoist dans le quartier,  
Et d'estoffes bien assorties  
I'ay vestu de chausse & pourpoint  
Ce Courtisan fort mal en point,  
Que l'on me paye mes parties.

Comme ils alloient executer ceste obligation, le Commissaire entre, qui demande que c'est, on luy mon-



stre des papiers, & en les lisant il est interrompu par les creanciers du Courtisan, cōtre lequel chacun d'eux presente requeste & ses parties au Commissaire pour auoir payement, ou permission de faire saisir la personne & les biens du Courtisan.

## LA BOISSELIERE.

**A** Moy qui suis la Boisseliere,  
De mon mestier Cabaretiere,  
Ce Courtisan manque de foy,  
Le meschant, le vilain pariure,  
Il voudroit bien me faire iniure,  
Luy qui fust mort de faim sans moy.

Bien qu'il fist par tout l'agreable,  
Afin d'auoir place à la table,  
Souuent sans moy, cet impudent,  
Qui ne trouuoit point de lipee,  
Eust mis en gage son espee,  
Ou desieuné d'un cure dent.

Quand ie n'estois pas arriuee,  
Ou que la table estoit leuee,

*Ou qu'il n'auoit place au bas bout,  
 Il contrefaisoit le malade,  
 Ou bien disnoit d'une salade,  
 Ou bien ne disnoit point du tout.*

*Ie l'ay nourry, ie l'ay fait viure,  
 Lors que le voleur venoit suiure  
 La Cour insqu'à Fontainebleau,  
 Et n'en ay point de recompence,  
 Que l'on me paye sa despence,  
 Ou bien qu'il laisse le manteau.*

#### PARTIES POVR LA BOISSELIERE.

**P**our le disner du Courtisan  
*Au Dimanche vn demy Faisan,  
 Plus vne soupe de marmite:  
 Pour le Lundy des poix nouueaux,  
 Vn potage fait de naueaux,  
 Au dessert vne poire cuite.*

*Au Mardy comme au Mercredy,  
 Et pour tout le iour du Iendy,  
 Vne espaule avec vne esclanche,  
 Tousiours le rosty, le bouilly,  
 Et le bon vin n'a point failly,  
 Le pain blanc, ny la nappe blanche.*



*Au Vendredy de bons œufs frais,  
L'Esté des febues de marais,  
L'Hyuer, de la fraische marée,  
Au Samedy mesme repas,  
La salade n'y manquoit pas,  
Les capres ny la chicoree.*

*Pour vn grand laquais tout pelé,  
Du mouton ou du bœuf salé,  
Et selon les saisons les viures,  
Plus, sans les tranches de iambon,  
En bois, en chandelle, en charbon,  
Le tout peut monter deux cens liures.*

## LE P A R F U M E U R.

**I'** Ay des gands d'Espagne, & des peaux,  
I'ay des pommades, & des eaux,  
Ie sçay faire la Cassolette,  
Les pastilles, les oiselets,  
Et bien parfumer les colets  
D'ambre, de musc, & de Ciuette,

*I'ay des muscadins excellens,  
Qui ne sont point trop violens,  
I'ay du vray baume de Iudee:  
Et de beaux secrets les meilleurs*

*Qu'on en puisse trouuer ailleurs,  
Pour estendre la peau ridee.*

*J'ay trouué la perfection  
De faire vne confection  
Qui guerit le mal de la mere,  
Je charge doucement la peau,  
Je sçay bien distiller vne eau  
Qui fait merueille & n'est pas chere.*

*J'ay de l'huile à blanchir les mains,  
Et tous les parfumeurs Romains  
N'auront point sur moy de victoire:  
J'ay contre tous les maux de cœur  
Vne douce & blanche liqueur,  
Dans ma longue boëste d'ynoire.*

*Qu'une Dame vse par neuf mois  
Tous les iours trois ou quatre fois  
D'une essence que j'ay secrette,  
Elle accouchera sans crier,  
Je ne me fais guiere prier  
Pour en apprendre la recette.*

*Mais j'ay tout quitté pour plaider,  
Et mon bon droict recommander  
A la Iustice accoustumee:  
Contre vn, dont ie n'espere rien,*

**Et**

9

*Et qui peut estre croira bien  
Payer mes parfums de fumee.*

## PARTIES DV PARFUMEVR.

**I** *Ay donné trois peaux de senteurs,  
Plus ie scay que mes seruiteurs  
Ont deliuré de l'eau d'orange,  
A ce braue donneur de vent,  
Et qu'il est venu bien souuent  
Remplir son zest de bonne eau d'Ange,*

*Plus il a pris des oiselets,  
Du papier à faire poulets,  
D'huile de Talc vne phiole,  
Des pommades & des sauons,  
Et des pastes que nous faisons  
Dont l'une vaut vne pistole.*

*Des gands d'Espagne & de Paris,  
Des poudres d'Ipre & d'Iris,  
Et du meilleur baume que i'aye:  
Faut-il qu'il se mocque de moy,  
Ie suis marchand de bonne foy,  
Ie demande que l'on me paye.*



## LA LINGERE DV PALLAIS.

**I**E suis Lingere du Palais,  
 J'ay des rabats, j'ay des colets,  
 J'ay des mouchoirs & des chemises,  
 Et ie fais fort bonne raison  
 Aux filles de bonne maison  
 A qui ie vends mes marchandises.

Je sçay fraizer, goderonner,  
 Je sçay blanchir & saonner,  
 Je ne trouue rien difficile,  
 Et lors que ie veux faire bien,  
 Les Flamandes n'y sçauent rien  
 L'empenze le micux de la ville.

Ce Courtisan, pour le blanchir  
 M'auoit promis de m'enrichir,  
 Mais c'est vne triste pratique,  
 Je demande mon payement,  
 Qu'on me dépesche vistement,  
 J'ay bien affaire en ma boutique.

## PARTIES POVR LA LINGERE.

**A**insi chacun en est trompé,  
 Il a de moy du poinct coupé

*Quatre douzaines de chemises,  
Des mouchoirs des coiffes de nuit,  
Et i'auois beau faire du bruit,  
Ce n'estoit rien que des remises.*

*Ie l'ay blanchy trois mois durant,  
Et ne dy pas le demeurant,  
Mais ie n'en ay pas eu la maille:  
Il me doit bien cinquante francs,  
D'auoir tenu ses rabats blancs,  
Qu'on me paye & que ie m'en aille.*

## LE MERCIER DV PALLAIS.

**I***E vends des manchons, des chapeaux,  
Des bas d'Angleterre fort beaux,  
Des ceintures en broderie,  
Dont ie fais à tous bon marché,  
Et suis tout le iour empesché  
Au Pallais dans la gallerie.*

*Mais quoy? ce Courtiran maudit,  
Prenant vn Castor à credit,  
Sans me demander ce qu'il couste,  
Me fait venir plaider icy,  
Si chacun me faisoit ainsi,  
Ie ferois bien tost banqueroute.*

## LA REVENDEUSE.

**I**E suis Reuendense publique,  
 Et des habits dont ie traffique.  
 J'ay fait credit, & m'en repens,  
 A cet afronteur sans parole,  
 Est-ce la raison qu'il me vole,  
 Et qu'il soit braue à mes despens?

## LE MARCHAND.

**N**Ous autres Bourgeois & Marchans.  
 Ie fon credit à des méchans,  
 Qui prennent noutre marchandise,  
 Moy, ie presty sous bonne foy  
 A ce Courtisan que ie voy  
 Du grou camelot de Turquie.

Il velet un pourpoint de deuil,  
 Et me feret si bon accueil,  
 En me trouuant dans ma boutique:  
 Mais quand ie l'enuogés chercher,  
 Le galland s'en alloit cacher,  
 On feignet chanter la Muricle.

Et quand ie le pressay bean fort.



*Il iusset le san & la mort,  
 La face pleine de choleze:  
 Monsieur, faites m'en la rairo  
 Au lieu de le mettre en priron,  
 Il le faudret bouter en galeze*

## LE PREMIER SERGENT.

*Q*ui me donnera de l'argent,  
 Je suis du mestier de Sergent,  
 Qui ne croit point en des paroles,  
 Et si l'on me pense tromper,  
 Ce Courtisan peut eschaper,  
 S'il me veut donner deux pistoles.

## LE SECOND.

*C*es affronteurs de Courtisans,  
 Font les vaillans, les suffisans,  
 Pensant qu'on n'ose les contraindre,  
 Mais tout de mesme qu'un valet,  
 Vous entrerez au Chastellet,  
 Vous avez beau dire & vous plaindre.

## LE COMMISSAIRE.

**P**uis qu'il n'a pas un seul denier,  
 Je le vais mettre prisonnier,  
 Il ne dit rien que des sornettes,  
 Crier, se fâcher, iurer Dieu,  
 Et dire qu'on est de bon lieu,  
 Cela n'est point payer ses debtes.

## LE COVRTISAN.

Cessez de plus me tourmenter.  
 Je vous feray tous contenter,  
 Alors que ie vendray ma terre:  
 J'attens une succession,  
 Puis j'espere une pension.  
 Ou bien que nous aurons la guerre,

## LA FEMME DV COVRTISAN

Prenez nos biens & les vendez,  
 Et de ce que vous pretendez,  
 Tirez de bonnes assurances:  
 Mais ne mettez point en prison  
 Un homme de bonne maison,  
 Plein de si belles esperances.

**L**E Commissaire accorde à la femme du Courtisan que son mary ne sera point mis en prison, les creanciers se retirent, le Courtisan, sa femme & le Commissaire demeurerent ensemble, & apres auoir vn peu dancé, au lieu que le Courtisan & la Dame deuoient remercier le Commissaire, le mettēt entr'eux deux le tourmentent de costé & d'autre : en fin luy donnent du pied au cul, le iettent par terre, & s'enfuyent, Le Diablen d'argent arriue, qui trouuant le Commissaire par terre, luy fait mille maux, & autāt de malices: puis le prenant par les mains, le leue de terre tout d'vne piece, & luy donnant des peurs extremes, le conduit avec vne infinité de mines & de grimaces hors de la salle. Le Commissaire ne laisse pas de r'entrer apres en son ordre avec les Creanciers, pour le payer tous en-



semble aux despens du Diable d'argent.

La Bouffonnerie acheuee , où le Courtisan, sa femme, le Commissaire & les Sergents estoient venus, chacun sur vn air, & vn pas differend ; le grand Ballet commença, dont le sujet estoit, à sçauoir qui estoit le plus fort Amour, celuy des Dames, ou de leurs seruiteurs: & pour en rapporter les effects, entroient deux Amours, celuy des hommes mené par la Constance, qui iouoit du luth: & celuy des femmes, mené par la Prudence, qui iouoit aussi du luth; & s'estant mis l'vn deuant l'autre, ils chanterent ces vers en dialogue, & finirent par vn deffy qu'ils se firent l'vn à l'autre.

# LE PREMIER AMOUR pour les hommes.

**O**N ne void point de changements,  
De pleurs, de plaintes, de tourments,  
En tous lieux où ie suis le maistre,  
Que les Dames ne fassent naistre.

# LE SECOND AMOUR pour les femmes.

**T**out le mal vient des Amoureux,  
Leur artifice est dangereux:  
Ils se font voir transis & blestes,  
Et cependant n'ayment qu'eux mesmes.

# LE PREMIER.

**D**es Dames vient la cruauté,  
Et faut que la legereté,  
D'elles, & non des hommes sorte:  
Car le nom de femme elle porte.

C

## LE LECONB.

**L**E changement & le mépris  
 Leurs beaux noms des hommes ont pris,  
 Cesse d'en accuser des belles,  
 La Constance est femme comme elles.

## LE PREMIER.

**M**esler de l'esper aux rigueurs,  
 Avoir des attraits à tous cœurs,  
 Et moins d'Amour que de malice,  
 Des Dames c'est tout l'exercice.

## LE SECOND.

**R**irc, en inuocquant le trespas,  
 Promettre la foy qu'on n'a pas,  
 Et puis en perdre la memoire,  
 Des hommes c'est la seule gloire.

## LE PREMIER.

**S**I tu veux dire, audacieux,  
 Que les Dames ayment le mieux,



*Et qu'il faut bien que l'on s'y fie,  
Vien au combat ie te deffie.*

L E S E C O N D.

**S***I pour te sauuer de la mort,  
Tune fuy, craignant mon effort,  
Ie me veux battre pour les Dames,  
Et t'oster ces traicts & ces flames.*

M.

**L***Es violons sonnerēt vn air, sous  
lequel les Amours combattirent  
ensemble. Ce pendant la Musique  
du Roy entra habillee en Vertus, &  
pour separer les deux Amours, chan-  
ta cette Stanse.*

**C***Essez petits guerriers, c'est assez combatu,  
L'Oracle qui des Dieux mōstre la cōnoissāce  
Vous apprend que l'Amour a le plus de puisāce,  
Où sa diuinité void le plus de vertu.*

**L***Es deux Amours separez, celuy  
des hommes alla vers la porte, où*

C ij

il trouua six Caualliers vestus de toile d'argent blanche, le corps & le bas de saye semez de flesches en broderie de canetille d'or & d'argent avec des bādes depuis la ccinture iusqu'à la moitié du bas de saye de toile d'argent blanche, les vnes en broderie de flāmes, & les autres de penne: la coiffure avec vne infinité d'aigrettes, le bas incarnat, la botine blanche, couuerte de clinquant d'or. Ils entrerent leur Amour deuant eux, & firent six figures au son des violons. L'Amour des femmes entra aussi tost à la teste de six Dames, habillees de toile d'argēt blanche, en broderie de flames de canetille d'or & d'argent, depuis la ccinture iusques à la moitié de la robe, avec des bandes pareilles à celles des Caualliers: leur coiffure estoit de guirlandes avec vn gros bouquet d'aigrettes. Et apres auoir fait six figures,

les Caualliers & les Dames se trouuoient ensemble , & dançoient le grand Ballet ; Puis les deux Amours se separoient, tenant chacun six arcs qu'il distribuoit fous vn air & vn pas nouveau aux Caualliers ou Dames de son party. Au meſme temps ſe faiſoit vn combat entr'eux, & les Dames deſarmoient les Caualliers, La cheſne ſe dançoit au ſon des luths & des voix , & à la fin l'Amour des hommes ſe trouuoit priſonnier de celui des femmes, & les Caualliers auſſi priſonniers des Dames, & la muſique chantoit des vers à la louange des Dames, & à la gloire de leur Amour.

**G**rand Roy des Peuples & des Rois,  
 Amour, i'adore mille fois  
 Ton arc, tes fleſches, & tes flames,  
 Et beny ton élection,  
 Qui cherchant la diſcretion,  
 Là va trouuer au cœur des Dames.

*Elles fuivent la verité  
Et les hommes la vanité,  
Les Dames sont les plus fidelles:  
Et leurs Amants presomptueux,  
Qu'on void tant soit peu vertueux,  
Ne tirent leur vertu que d'elles.*

FIN.



## *Extrait du Priuilege du Roy.*

**P**Ar grace & Priuilege du Roy il est permis à Toussainct du Bray, Marchand Libraire Iuré de nostre ville de Paris, d'imprimer ou faire imprimer, vendre & distribuer par cestuy nostre Royaume & terres de nostre obeissance, vn liure intitulé *Le Ballet du Courtisan*: Et deffenses sont faites à tous autres Libraires & Imprimeurs de les imprimer, contrefaire, ny alterer sans le congé & consentement dudit du Bray, pendant le temps & terme de six ans entiers & accomplis, sur peine de confiscation des impressions qui en seront trouuees contrefaictes, & de tous despens, dommages & interests enuers ledit du Bray. Voulans en outre qu'en mettant vn bref sommaire au commencement ou à la fin dudit liure, il soit tenu pour deuëment signifié à qui il appartiendra, ainsi que plus amplement est contenu & déclaré es lettres dudit priuilege. Donné à Paris le 28. iour de Mars 1612. & de nostre regne le deuxiesme.

Par le Roy en son Conseil,

DE VABRES.







